

Greiðslur í sjóðinn miðast við 60% af verðbreytingu frá grundvallarverði að viðbættu eða frádregnu verðbili.

Verðgrundvöllur þessi er breytanlegur á tímabilinu, ef hráefnisverði verður sagt upp og því breytt.

Sjávarútvegsráðuneytið, 22. maí 1978.

F. h. r.

Jón L. Arnalds.

Kristín Magnússon.

AUGLÝSING

um reglugerð sem númerin er úr gildi.

Reglugerð um vistun lyfjafræðistudenta til verklegs náms nr. 326 13. nóvember 1973 er hér með úr gildi felld.

Heilbrigðis- og tryggingamálaráðuneytið, 18. apríl 1978.

F. h. r.

Jón Ingimarsson.

Almar Grimsson.

SAMÞYKKT

um stjórn Sauðárkróks.

I. KAFLI

Um skipan bæjarstjórnar og verkefni hennar.

1. gr.

Bæjarstjórn Sauðárkróks er skipuð 9 bæjarfulltrúum, kjörnum samkvæmt lögum nr. 5/1962.

2. gr.

Bæjarstjórn Sauðárkróks er almennt í fyrirsvari fyrir bæinn og skal engu máli, er hann varðar, til lykta ráðið án umsagnar bæjarstjórnar.

Bæjarstjórninni ber að gæta hagsmuna bæjarins í hvívetna og annast þau viðfangsefni, sem henni eru fengin í lögum og reglugerðum, svo og málefni, sem henni eru fengin í samþykktum, er hún hefur sett eða á henni kunna að hvíla að öðru leyti.

Meginverkefni hennar eru þessi:

A. Bæjarstjórn fer með yfirstjórn á fjárreiðum bæjarins.

1. Fyrir lok desembermánaðar ár hvert ber bæjarstjórn að gera áætlun um tekjur og gjöld bæjarins fyrir næsta reikningsár (almanaksár).

Í fjárhagsáætlun skal sýna í meginatriðum, hvernig áætlaðar tekjur skiptast, hvernig fjárveitingu til einstakra stofnana og framkvæmda skuli hagað, sbr. B-lið.

2. Bæjarstjórn hefur yfirumsjón með fjárstjórn bæjarins, sér um að tekjur séu innheimtar og greiðslur inntar af hendi í samræmi við það, sem ákveðið er í fjárhagsáætlun.
 3. Hún hefur yfirumsjón með því, að eignir bæjarins séu tryggilega varðveittar.
 4. Bæjarstjórn skal hafa lagt fullnaðarúrskurð á ársreikninga bæjarins eigi síðar en í júlímánuði ár hvert.
- B. Bæjarstjórn hefur yfirumsjón verklegra framkvæmda bæjarins. Í fjárhagsáætlun kveður hún m. a. á um, hvernig verklegum framkvæmdum skuli hagað í meginatriðum á fjárhagsárinu. Hún getur og gert heildaráætlanir um framkvæmd tiltekinna verkefna, er taki lengri tíma, svo og um einstök verk, eftir því sem ástæða þykir til.
- C. Bæjarstjórn kýs eða ræður bæjarstjóra, kýs bæjarráð og aðrar nefndir eftir því sem segir í reglugerð þessari eða öðrum samþykktum, svo og endurskoðendur reikninga bæjarins. Ennfremur ræður hún fasta starfsmenn bæjarins og semur um laun þeirra.
- D. Bæjarstjórn setur reglur um stjórn bæjarmálefna og reglur um meðferð tiltekinna málefna bæjarins, ákveður gjaldskrá bæjarfyrirtækja eftir því, sem þörf krefur o. s. frv.

II. KAFLI

Fundarsköp bæjarstjórnar.

3. gr.

Á fyrri tundi bæjarstjórnar í júnímánuði ár hvert kýs bæjarstjórn sér forseta, svo og 1. og 2. varaforseta úr hópi bæjarfulltrúa til eins árs. Sá er rétt kjörinn forseti, sem fengið hefur 5 eða fleiri atkvæði. Verði þeim atkvæðafjöldi ekki náð við tvennar óbundnar kosningar, skal kjósa bundinni kosningu um þá tvo, sem flest atkvæði fengu. Ef þrír eða fleiri hafa fengið jafnmörg atkvæði, skal varpa hlutkesti um hverja tvo þeirra skuli kjósa. Verður þá rétt kjörinn sá, sem fleiri atkvæði fær. Þó að hann fái ekki helming atkvæða. Verði atkvæði jöfn, ræður hlutkesti.

Aldursforseti gegnir forsetastörfum uns kosinn hefur verið forseti. Ef enginn forseta er viðstaddur á fundi bæjarstjórnar, gegnir aldursforseti forsetastörfum, nema bæjarstjórn ákveði að kjósa sérstakan fundarstjóra í það skipti.

Ef forseti deyr eða varaforseti eða verður varanlega forfallaður frá störfum í bæjarstjórn, áður en kjörtími hans er á enda, skal kjósa forseta í hans stað fyrir þann tíma, sem eftir er kjörtímabilsins.

4. gr.

Forseti bæjarstjórnar stjórnar umræðum á fundum hennar. Hann sér um, að fundargerðir séu skipulega færðar í gerðabók og allar ályktanir séu rétt og nákvæmlega bókaðar.

Forseti sér um, að allt fari löglega og skipulega fram á fundum bæjarstjórnar. Hann úrskurðar um skilning á fundarsköpum, skv. samþykkt þessari, en skjóta má úrskurði hans til úrlausnar bæjarstjórnar.

5. gr.

Bæjarstjórn kýs tvo skrifara og tvo varaskrifara úr hópi bæjarfulltrúa til eins árs í senn á sama fundi og forsetakosning fer fram.

Skrifarar skulu kosnir hlutfallskosningu. Skrifarar skulu telja saman atkvæði, þá er atkvæðagreiðslur fara fram.

6. gr.

Bæjarstjórn ræður sérstakan fundarritara utan bæjarstjórnar, sem sér um færslu gerðabókar, og hafa skrifarar í samráði við forseta eftirlit með því, að rétt sé fært til bókar.

Í gerðabók skal þess geta, hvar og hvenær fundur sé haldinn, hverjir sitji fundinn og hver sé fundarritari.

Í fundarlok skal lesa upp gerðabók, og skulu allir viðstaddir fulltrúar undirrita hana. Hver fulltrúi, sem eigi er samróma hinum, á rétt á því, að ágreiningsálit hans verði ritað með fáum orðum í gerðabókina.

7. gr.

Bæjarstjórn heldur fundi að jafnaði hálfsmánaðarlega og þá á þriðjudögum, og skal fundur að jafnaði hefjast kl. 17.00. Heimilt er bæjarstjórn að fækka fundum í júlí og ágúst.

Aukafundi skal halda, skv. ákvörðun bæjarstjóra, forseta bæjarstjórnar, eða ef 3 bæjarfulltrúar hið fæsta krefjast þess.

8. gr.

Bæjarstjóri semur dagskrá bæjarstjórnarfundar.

Á dagskrá skal taka:

1. Fundargerðir bæjarráðs og annarra lögmætra nefnda, sem þurfa kunna staðfestingar bæjarstjórnar á ályktunum sínum.
2. Kynningu fundargerða stjórna þeirra stofnana og fyrirtækja, sem bærinn á aðild að, eða er þátttakandi í.
3. Hvert það mál, sem fellur undir verksvið bæjarstjórnar, skv. 2. gr., sbr. og 10. gr. laga nr. 58/1961, enda sé þess óskað af bæjarstjóra, bæjarráði, lögmætri nefnd eða bæjarfulltrúa, að málið sé á dagskrá tekið.
4. Lögmætar kosningar nefnda og starfsmanna, svo og hvert það málefni annað, sem bæjarstjórn á um að fjalla að lögum. Sá, sem óskar að fá mál tekið á dagskrá bæjarstjórnar, skal tilkynna það bæjarstjóra skriflega eigi síðar en kl. 12 á hádegis degi daginn næstan fyrir auglýstan fund.

Bæjarstjóri skal sólarhring fyrir auglýstan fund hafa sent öllum bæjarfulltrúum, og jafn mörgum varafulltrúum, dagskrá næsta bæjarstjórnarfundar. Í dagskrá skal tilgreina fundarstað og tíma, þær fundargerðir, sem fyrir fundi liggja, tillögur sem fram hafa komið, og gera í stuttu máli grein fyrir þeim málum öðrum, sem um skal fjallað. Fylgja skulu eftirrit fundargerða, tillagna, svo og annarra gagna, sem geta til upplýsingar orðið um málefni á dagskrá, eftir því sem bæjarstjóri telur nauðsynlegt.

Mál skulu afgreidd í þeirri röð, sem dagskrá segir, nema bæjarstjórn ákveði að önnur röð skuli höfð.

Heimilt er að taka mál á dagskrá, þótt ekki sé þess getið í fundarboði, enda samþykki $\frac{2}{3}$ viðstaddra bæjarfulltrúa þau afbrigði.

9. gr.

Á reglulegum fundarstað bæjarstjórnar skal auglýsa fundi bæjarstjórnar með a. m. k. 24 stunda fyrirvara og greina þar dagskrá fundar.

10. gr.

Bæjarstjórnarfundur skal halda í heyranda hljóði. Bæjarstjórn getur þó ákveðið, að ræða einstök mál fyrir luktum dyrum, t. d. einkamál manna eða mál, sem æskilegt er vegna hagsmuna þegarins að séu þannig rædd. Ef tillaga kemur fram um það, að mál skuli rætt fyrir luktum dyrum, skal úr því skorið án umræðna.

Óheimilt er að skýra frá því, sem fram kemur við umræður á lokuðum fundi. Ef áheyrandi á bæjarstjórnarfundum raskar fundarfriði, getur forseti látið vísa honum út.

11. gr.

Bæjarstjórn getur enga ályktun gert, nema meira en helmingur bæjarfulltrúa sé viðstaddur á fundi. Afl atkvæða ræður úrslitum mála.

Bæjarstjóri og hver bæjarfulltrúi getur borið fram breytingartillögu, viðauka-tillögu eða frávísunartillögu við hvert það mál, sem til umræðu er, og bæjarstjórn á úrskurðarvald um.

Ef jafnmörg atkvæði eru með máli og móti fellur það, nema við kosningar, þá ræður hlutkesti.

Mál má afgreiða með því að samþykkja það eða fella, vísa því frá með einfaldri eða rökstuddri dagskrá, vísa því til afgreiðslu bæjarstjóra eða nefndar eða með því að fresta því.

Forseti sker úr því, hvernig atkvæðagreiðslum um tillögur skuli hagað.

12. gr.

Bæjarstjórn afgreiðir mál við eina umræðu nema fjárhagsáætlun bæjarins og bæjarfyrirtækja, ársreikninga og reglugerðir, sem hljóta skulu staðfestingu ráðherra.

Um þessi mál skulu fram fara tvær umræður og liða ein vika hið skemmsta milli umræðna.

13. gr.

Atkvæðagreiðsla fer þannig fram, að bæjarfulltrúi réttir upp hægri hönd. Nafnakall skal hafa, ef forseti ákveður, bæjarstjóri óskar eða bæjarfulltrúi. Við nafnakall greiða bæjarfulltrúar atkvæði eftir skrá um bæjarfulltrúa í stafrófsröð. Nöfnum varafulltrúa skal bæta á skrána í rétttri röð í stað nafna þeirra sem fjarstaddir eru.

Hlutkesti ræður á hverjum byrja skal.

14. gr.

Hver bæjarfulltrúi, sem taka vill til máls, skal óska heimildar forseta. Að jafnaði skulu menn taka til máls í þeirri röð, sem þeir hafa kvatt sér hljóðs. Heimilt er að víkja frá þessu, ef um er að ræða bæjarstjóra eða framsögumann svo og bæjarfulltrúa, sem gera vill stutta athugasemd eða leiðréttu ummæli um sjálfan hann.

Ef tveir eða fleiri kveðja sér samtímis hljóðs, ákveður forseti í hvaða röð þeir tala.

Bæjarstjórn getur heimilað, að maður utan bæjarstjórnar megi tala á bæjarstjórnarfundum, en skylt skal honum þá að gæta í hvívetna fundarskapa.

15. gr.

Flutningsmaður tillögu má tala þrisvar við hverja umræðu máls, en aðrir bæjarfulltrúar tvisvar. Bæjarfulltrúa er þó heimilt að taka oftari til máls til að bera af sér ámæli eða gera stutta athugasemd.

Ef bæjarfulltrúi vill beina fyrirspurn til bæjarstjóra, skal hann að jafnaði hafa hana skriflega og afhenda með sama fyrirvara og um tillögu sé að ræða.

16. gr.

Bæjarfulltrúi skal beina máli sínu til forseta. Ef bæjarfulltrúi tekur til máls við afgreiðslu á fundargerð nefndar, skal hann í upphafi taka fram hvaða lið eða liði fundargerðar hann óski að ræða, og má ekki ræða nema eitt mál í einu.

Ekki má lesa upp prentað mál, nema forseti leyfi.

17. gr.

Ef forseti telur umræður dragast úr hófi fram, getur hann lagt til, að ræðutími hvers bæjarfulltrúa megi ekki fara fram úr ákveðinni tímalengd eða umræðum verði hætt.

Þá getur forseti, hvenær sem er, lagt til að umræðu skuli lokið á ákveðnum tíma. Ekki má þó takmarka umræðu svo, að hún standi skemur en tvo tíma, meðan nokkur bæjarfulltrúi kveður sér hljóðs.

Bæjarstjórn afgreiðir tillögur forseta, skv. 1. og 2. mgr. umræðulaust.

Þrír bæjarfulltrúar hið fæsta geta borið fram slíkar tillögur, og skulu þær einnig afgreiddar umræðulaust.

Ákvæði um takmörkun ræðutíma eiga ekki við, þegar fjallað er um frumvarp að fjárhagsáætlun.

18. gr.

Skýlt er bæjarfulltrúa að lúta valdi forseta í hvívetna, er að því lýtur að gætt sé góðrar reglu.

Ef bæjarfulltrúi ber aðra menn brigslum eða víkur verulega frá umræðuefninu, skal forseti víta hann. Ef bæjarfulltrúi er vittur tvisvar á sama fundi, getur forseti lagt til við bæjarstjórn, að hann verði sviptur málfrelsi framar á þeim fundi. Skal sú tillaga afgreidd umræðulaust.

Ef bæjarfulltrúi hlýðnast ekki úrskurði bæjarstjórnar eða almenn óregla kemur upp á fundi, skal forseti gera hlé um stundarsakir eða ef nauðsyn krefur, slíta fundi.

19. gr.

Bæjarstjórn getur ákveðið, að allar umræður í bæjarstjórn skuli skrásettar. Má þá ekkert undan falla, sem fram hefur komið á fundi bæjarstjórnar og handrit af umræðum bera með sér. Engar breytingar má gera, nema leiðrétta þurfi auðsæjar og sannanlegar villur.

III. KAFLI

Réttindi og skyldur bæjarfulltrúa.

20. gr.

Hverjum bæjarfulltrúa er skylt að sækja fundi bæjarstjórnar, nema lögmæt forföll hamli.

Honum er skylt að taka að sér þau störf, sem bæjarstjórn felur honum, t. d. forsetastörf, setu í bæjarráði eða öðrum nefndum o. s. frv.

Sá, sem verið hefur forseti bæjarstjórnar, setið í bæjarráði eða annarri nefnd, getur þó skorast undan kosningu jafnlangan tíma og hann hefur haft starfið á hendi.

21. gr.

Bæjarfulltrúum er heimilt að kynna sér skjöl bæjarins.

22. gr.

Hver bæjarfulltrúi á rétt á tiltekinni þóknun fyrir störf sín í bæjarstjórn eftir ákvörðun bæjarstjórnar.

23. gr.

Ef bæjarfulltrúi, kosinn í nefnd eða til annarra starfa, forfallast um stundarsakir vegna veikinda eða af öðrum ástæðum, á hann rétt á að tilnefna mann af sama lista, og hann var kjörinn, til að taka sæti hans á meðan, enda hafi varafulltrúi ekki verið kosinn.

Hafi hann engan tilnefnt, fer um varamann skv. 2. og 3. mgr. 20. gr. sveitarstjórnarlaga.

24. gr.

Bæjarstjórn getur veitt bæjarfulltrúa, sem þess óskar, lausn frá bæjarfulltrúastarfi.

IV. KAFLI.

Um Bæjarráð, Félagsmálaráð og Veitustjórn.

25. gr.

Bæjarráð:

Á fundi bæjarstjórnar í júní skulu kosnir þrír bæjarfulltrúar í bæjarráð og jafnmargir til vara. Kosning bæjarráðs gildir, uns nýtt bæjarráð hefur verið kosið. Bæjarráð kýs sér formann og má kjósa bæjarstjóra, þótt ekki sé hann kjörinn í ráðið.

Bæjarráð skal halda fund að jafnaði einu sinni í viku, á fimmtudögum kl. 4 e. h. Heimilt er þó bæjarráði að fækka fundum í júlí og ágústmánuðum. Aukafund skal halda, ef bæjarstjóri ákveður það eða einn bæjarráðsmaður óskar þess skriflega. Formaður sér um, að allt fari löglega og skipulega fram á fundum, og úrskurðar ágreiningsmál, sem rísa kunna út af fundarsköpum. Þeim úrskurði má skjóta til úrlausnar bæjarráðs.

Bæjarráð ræður fundarritara.

Í gerðabók skal greint frá því, hvar fundur sé haldinn og hvenær, hverjir sitji fundinn og hver sé fundarritari. Þar skal greint frá framlögðum skjölum og efni þeirra í stuttu máli, svo og hverja afgreiðslu þau fá.

Um fundarsköp bæjarráðs fer eftir sömu reglum og gilda um bæjarstjórn eftir því, sem þau geta átt við.

26. gr.

Bæjarráð fer ásamt bæjarstjóra með framkvæmdastjórn málefna Sauðárkróks-kaupstaðar að því leyti, sem hún er ekki öðrum fengin skv. lögum, reglugerðum eða sérstökum samþykktum bæjarstjórnar.

27. gr.

Bæjarráð hefur eftirlit með fjárstjórn bæjarins, sbr. 47. gr. laga nr. 58/1961. Það undirbýr árlega fjárhagsáætlun bæjarins, og sér um, að reikningar hans séu samdir.

Bæjarráð ákveður, hvernig varið skuli fé því, sem ætlað er til verklegra framkvæmda, að því leyti, sem slíkt er ekki fram tekið í fjárhagsáætlun.

28. gr.

Skýlt er starfsmönnum bæjarins að sitja fundi bæjarráðs, þegar til umræðu er málefni, sem störf þeirra snerta og bæjarstjóri eða bæjarráð óskar að þeir sitji fund.

29. gr.

Félagsmálaráð:

Á fundi í júnímánuði ár hvert kýs bæjarstjórn í Félagsmálaráð fimm menn og fimm til vara. Tveir fulltrúar hið minnsta skulu vera aðalfulltrúar í bæjarstjórn og skal aðalfulltrúi í bæjarstjórn vera formaður ráðsins.

Félagsmálaráð kýs sér formann.

Félagsmálaráð heldur fundi eigi sjaldnar en einu sinni í mánuði.

Skýlt er ráðinu að koma saman til fundar ef bæjarstjóri eða tveir nefndarmenn óska þess.

30. gr.

Aðal verksvið Félagsmálaráðs eru framfærslumál, barnavernd, dagvistun barna, barnaleikvællir, unglingavinna, æskulýðs- og íþróttamál, þjónusta við aldraða, heimilishjálp, tómstunda- og útivistarmál, svo og önnur skyld málefni sem bæjarstjórn felur ráðinu að annast.

31. gr.

Félagsmálaráð gerir tillögur til bæjarstjórnar um ráðningu starfsmanna bæjarins á sviði félagsmálefna, skipuleggur starfssvið þeirra og hefur eftirlit með störfum þeirra.

Félagsmálaráð gerir tillögur til bæjarráðs um fjárframlög til hinna einstöku málaflokka, er það hefur umsjón með og um styrkveitingar til félaga í bænum í sambandi við gerð fjárhagsáætlana.

32. gr.

Veitustjórn:

Á fundi bæjarstjórnar í júní skulu kosnir í Veitustjórn þrír bæjarfulltrúar eða varabæjarfulltrúar og jafn margir til vara. Formaður Veitustjórnar skal vera aðalfulltrúi í bæjarstjórn og kýs Veitustjórn hann.

Kosning Veitustjórnar gildir þar til ný hefur verið kosin.

Með Veitustjórn skulu starfa ráðnir forstöðumenn Rafveitu, Hitaveitu og Vatnsveitu.

Fundi skal halda reglulega aðra hvora viku og oft, ef formaður, forstöðumenn veitna eða stjórnarmenn óska.

33. gr.

Veitustjórn hefur eftirlit með fjárstjórn og framkvæmdum Rafveitu, Hitaveitu og Vatnsveitu, leggur fram tillögur um fjárhagsáætlun og framkvæmdaáætlun fyrir hvert starfsár í tengslum við fjárhagsáætlun bæjarins. Rafveita, Hitaveita og Vatnsveita skulu hver um sig hafa sjálfstæðan fjárhag og skila sérstöku reikningsuppgjöri.

Veitustjórn hagar fjárstjórn veitnanna þannig, að þær séu reknar fyrir þjónustugjöld, samkvæmt fyrirfram samþykktri gjaldskrá og með lánsfé til reksturs og framkvæmda, sem bæjarstjórn samþykkir.

Laun nefndarmanna í Veitustjórn skulu vera hin sömu og fulltrúa í bæjarráði miðað við fjölda funda og skiptist kostnaðurinn á veiturnar eftir upphæð veitugjalda.

V. KAFLI**Um kosningu nefnda o. fl.****34. gr.**

Um skipan nefnda, valdsvið þeirra og verksvið fer eftir því sem ákveðið er í lögum eða samþykktum bæjarstjórnar.

Ekki má framselja nefnd vald, sem bæjarstjórn er fengið að lögum.

Þegar kjörtími nefnda er óákveðinn, skal líta svo á, að umboð nefndarmanna falli niður, þegar kjörtími bæjarstjórnar er á enda. Þó skal lítið svo á að nefnd sem hefur til úrlausnar ákveðið afmarkað verkefni, haldi áfram starfstíma sínum, þar til verkefnið er til lykta leitt, nema bæjarstjórn álykti sérstaklega um að leysa hana frá störfum.

35. gr.

A. Á fyrsta fundi nýkjörinnar bæjarstjórnar og síðan á fundi bæjarstjórnar í júní mánuði út kjörtímabilið, skal kjósa eftirtaldir nefndir til eins árs:

1. Bæjarráð samkv. ákvæðum í 4. kafla samþykktanna.
 2. Félagsmálaráð, samkv. ákvæðum 4. kafla samþykktanna.
 3. Veitustjórn, samkv. 4. kafla samþykktanna.
 4. Atvinnumálanefnd — 7 aðalmenn og 7 til vara.
 5. Bygginganefnd — 4 aðalmenn, þar af eigi færri en tvo bæjarfulltrúa og varamenn skal kjósa á sama hátt.
 6. Hafnarnefnd — 4 aðalmenn, þar af eigi færri en tvo bæjarfulltrúa og varamenn á sama hátt.
 7. Kjörstjórn — 3 aðalmenn og 3 til vara (kjörstjórn við alþingiskosningar er yfirkjörstjórn við bæjarstjórnarkosningar).
 8. Endurskoðendur bæjarreikninga — 2 aðalmenn og 2 til vara.
- B. Á fyrsta eða öðrum fundi nýkjörinnar bæjarstjórnar skal kjósa í eftirtaldar nefndir til 4 ára:
1. Skólanefnd — 5 aðalmenn og 5 varamenn.
 2. Iðnskólanefnd — 2 aðalmenn og 2 varamenn.
 3. Heilbrigðisnefnd 5 aðalmenn og 5 varamenn.
 4. Áfengisvarnarnefnd — 6 aðalmenn og 6 varamenn.
 5. Muna- og minjanefnd — 3 aðalmenn og 3 varamenn.
 6. Stjórn Safnahúss og Bókasafns — 3 aðalmenn og 3 varamenn.
 7. Náttúruverndarnefnd — 5 aðalmenn og 5 varamenn.
 8. Sáttanefnd — 2 aðalmenn og 2 varamenn.
 9. Sjúkrasamlagsstjórn — 4 aðalmenn og 4 varamenn.
 10. Stjórn sjúkrahúss — 1 aðalmaður og 1 varamaður.
 11. Sjó- og verslunardómur — 9 aðalmenn og 9 varamenn.
 12. Skólanefnd Tónlistarskóla — 1 aðalmaður og 1 varamaður.
 13. Skógræktarsjóður Skagafjarðar — 1 aðalmaður og 1 varamaður.
 14. Skagfirðingasjóður — 1 aðalmaður og 1 varamaður.
 15. Sjóður Guðrúnar Þ. Sveinsdóttur — 1 aðalmaður og 1 varamaður.
 16. Landsþing Sambands ísl. sveitarfélaga — 2 aðalmenn og 2 varamenn.
 17. Fjórðungsþing Fjórðungssambands Norðlendinga — 2 aðalmenn og 2 varamenn.
 18. Fulltrúaráð Brunabótafélags Íslands — 1 aðalmaður og 1 varamaður.
 19. Endurskoðendur Menningarsjóðs Sparisjóðs Sauðárkróks — 2 aðalmenn og 2 varamenn.
 20. Endurskoðanda reikninga Sjúkrahúss Skagfirðinga — 1 aðalmaður og 1 varamaður.
- C. Aðrar nefndir eftir ákvörðun bæjarstjórnar.

VI. KAFLI

Um starfsmenn bæjarins.

36. gr.

Bæjarstjórn ræður fasta starfsmenn bæjarins og veitir þeim lausn, eftir því sem nánar segir í reglugerð þessari, nema vald til slíks sé að lögum fengið öðrum aðilum eða á annan veg mælt fyrir í reglugerð um sérmál tiltekinna stofnana.

Áður en ráðið er í fast starf, skal að jafnaði auglýsa starfið laust til umsóknar. Bæjarstjórn getur ákveðið hver almann skilyrði skulu gilda um ráðningu í störf hjá bænum, svo og sérskilýrði, er gilda skuli um ákveðin störf.

Bæjarstjórn getur kveðið á um starfssvið fastra starfsmanna bæjarins og sett þeim erindisbréf. Skyld er starfsmönnum að hlíta breytingu á starfssviði sínu, enda missi þeir einskis af launum við þá breytingu.

Uppsagnafrestur fastra starfsmanna bæjarins skal vera þrír mánuðir.

VII. KAFLI. Um bæjarstjóra.

37. gr.

Bæjarstjórn ræður bæjarstjóra. Ráðningartími skal að jafnaði vera hinn sami og kjörtímabil bæjarstjórnar.

Heimilt er þó að ráða bæjarstjóra til lengri tíma. Ráðningarsamningur er uppsegjanlegur af beggja hálfu með sex mánaða fyrirvara.

Nú næst ekki meiri hluti í bæjarstjórn fyrir ráðningu bæjarstjóra, svo að bæjarstjóri er í andstöðu við meiri hluta bæjarstjórnar, og getur þá ráðherra ákveðið, að bæjarstjórnarkosningar skuli fara fram á ný.

38. gr.

Bæjarstjóri hefur á hendi framkvæmd ákvarðana þeirra, sem bæjarstjórn og bæjarráð taka sbr. 26. gr.

Bæjarstjóri auglýsir eftir fólki í föst störf hjá bænum og bæjarfyrirtækjum eftir ákvörðun bæjarstjórnar þar um og gerir tillögur til bæjarstjórnar um skipun í þau störf.

Lausráðning fólks til skamms tíma ákvarðar bæjarstjóri í samráði við bæjarráð og forstöðumenn fyrirtækja bæjarins.

39. gr.

Bæjarstjóri á sæti á fundum bæjarstjórnar og bæjarráðs og hefur þar sömu réttindi og skyldur sem bæjarfulltrúar, nema annað sé sérstaklega fram tekið í þessari samþykkt.

Ekki hefur hann atkvæðisrétt, nema jafnframt sé hann bæjarfulltrúi. Hann hefur óbundið málfrelsi og tillögurétt á fundum bæjarstjórnar, bæjarráðs og nefnda, þótt hann sé ekki í þær kosinn.

40. gr.

Nú samþykkir bæjarstjórn ályktun, sem hefur verulegan kostnað í för með sér, sem ekki hefur verið gert ráð fyrir í gildandi fjárhagsáætlun, og getur bæjarstjóri þá fellt slíka ályktun úr gildi um sinn, og skal þessi ákvörðun hans færð í gerðabókina.

Um þetta skal hann svo fljótt sem verða má, senda ráðuneytinu skýrslu, og leggur það úrskurð á málið.

Bæjarstjóri skal senda bæjarstjórninni eftirrit af skýrslunni, svo að hún geti gert athugasemdir við hana, áður en hún fer til ráðuneytisins. Þá getur bæjarstjóri skotið til fullnaðarákvörðunar bæjarstjórnar ályktunum bæjarráðs, sbr. 3. mgr. 27. gr.

41. gr.

Útgjöld, sem ekki eru lögbundin, samningsbundin eða leiðir af fyrri samþykkt bæjarstjórnar, má ekki greiða, nema til komi samþykkt bæjarstjórnar. Ekkert gjald má greiða úr bæjarsjóði, nema bæjarstjóri ávísi því til greiðslu eða einhver sá, sem fengið hefur umboð bæjarráðs til slíks.

42. gr.

Bæjarstjóra er heimilt að fengnu samþykki bæjarráðs, að fela öðrum að gegna störfum sínum í forföllum.

43. gr.

Skrifstofustjóri bæjarins er jafnframt bæjargjaldkeri, og hefur með höndum daglega stjórnun í fjármálum bæjarins undir stjórn bæjarstjóra, þar á meðal gerð

og útsendingu gjaldseðla, innheimtu tekna bæjarins og umsjón með daglegu starfi á skrifstofum.

VIII. KAFLI.

Um endurskoðendur.

44. gr.

Bæjarstjórn ræður löggiltan endurskoðanda til þess að annast faglega endurskoðun bókhalds bæjarins og uppsetningu reikninga bæjarins og bæjarfyrirtækja. Hann skal gefa bæjarstjórn skriflega skýrslu um reikningshaldið árlega.

Bæjarstjórn kýs tvo endurskoðendur til eins árs í senn og tvo til vara til þess að framkvæma heildarendurskoðun á reikningum og rekstri bæjarins og bæjarfyrirtækja, og skulu þeir skila skriflegri skýrslu um störf sín til bæjarstjórnar, þegar ársreikningar eru lagðir fram.

Bæjarfulltrúar eru ekki kjörgengir til þessara starfa.

Um framkvæmd endurskoðunar fer eftir ákvæðum d.-liðs 3. kafla laga nr. 58/1961.

Endurskoðun kjörinna endurskoðenda skal lokið eins snemma árs og kostur er og eigi síðar en 30. júní ár hvert.

Endurskoðendur eiga rétt á þóknun fyrir störf sín, eftir ákvörðun bæjarráðs.

Samþykkt þessi, sem bæjarstjórn Sauðárkróks hefur samþykkt við tvær umræður, staðfestist hér með samkv. lögum nr. 58 29. mars 1961, til þess að öðlast gildi þegar í stað og birtist til eftirbreytni öllum þeim, sem hlut eiga að máli.

Jafnframt er úr gildi felld samþykkt um stjórn Sauðárkróks nr. 66/1963.

Félagsmálaráðuneytið, 13. apríl 1978.

F. h. r.

Hallgrímur Dalberg.

Hólmfríður Snæbjörnsdóttir.

AUGLÝSING

um friðland í Esjufjöllum.

Samkvæmt heimild í 24. gr. laga nr. 47/1971 um náttúruvernd hefur Náttúruverndarráð ákveðið fyrir sitt leyti að friðlýsa Esjufjöll og önnur jökulsker í Breiðamerkurjökli ásamt nánasta umhverfi.

Mörk hins friðlýsta svæðis eru þessi:

Til friðlandsins teljast Esjufjöll, Mávabyggðir, Kárasker og Bræðrasker og svæði umhverfis sem markast af 64°18'N, 16°21'V, 64°07'N, og 16°39'V.

Þessar reglur gilda um friðlandið:

1. Allt jarðrask og aðrar breytingar á landi eru óheimilar.
2. Óheimilt er að skaða dýralíf, skerða gróður, breyta honum eða spilla vatni.
3. Umferð vélknúinna ökutækja er bönnuð nema á jökli.
4. Fólki er heimil för um friðlandið, en skylt að ganga þannig um að hvergi sé spillt lífi né landi.
5. Aðeins er heimilt að tjalda við Tjaldmýri í Skálabjörgum.
6. Notkun skotvopna er bönnuð.